

Gadataidi inānite Pabodo nānō cadota ante yewæmongainta

*Gadataidi inānite Pabodo, Waa quëwëedāni,
angampa*

¹ Botō Pabodobo inōmo inte, Minitō acæminimpa, ante yewæmōmopa. Mæmpo Wængonguī incæ Itota Codito ingante, Nāni òmæmōe, angā nāni òmæmongacäimpa. Mæmpocä inōmō Itota Codito tōnō guëa cædinque botō imote da godonga gotabopa. Ininque botō dicæ waodānique ānāni ëñente gotabogaa. Botō imote edæ dicæ waocanique da godongā gotabogaa. ² Minitō Gadatiabæ wayōmō wacabo wayōmō wacabo quëwëmini inte Codito ingante mini godongämæ pōnencabo inōmini inte edæ ëñencæminimpa, ante mōnitō mōni pōnencabo tōmāmōni iīmaī ante apænemōnipa.

³ Wængonguī mōnō Mæmpo tōnō mōnō Awënë Itota Codito godongämæ pōnō waadete cæda ate mīnitō gānē pōnente waa quëwencæminimpa, āmōnipa. ⁴ Adocä mōnō Mæmpo Wængonguī inōmō, Minitō pedænguipogaque wīwa cæte mīni wæwëñōmō edæ abæ tawænte ponte bai botō gämænō ponte quëwëedāni, angampa. Ininque, Wængonguī nānō angainō bai cæcæminimpa, ante cædinque mōnō Awënë Itota Codito mōnō imonte ò æncæte ante cægacäimpa. Mīni wënæ wënæ cæpāmo mongæncæboimpa, ante tōmengā nāmā

wepæ pædæ godonte bai cædinqe pönö ængä beyænque mönö wæætë quëwëmompä. ⁵ Edæ pedænguipoga iñonte münguipoga bayonte edæ, Mänömai bacæimpa, ante në angaingä inongä inte mönö Mæmpo Wængongui iñömö edæ cöwë ñäö apäite bai waëmö pöni ëmönongä ingänö angüënë. Mänömai impa, ante botö, Amëë, ämopa.

Codito ingantedö ante watapæ ëñengæimpa

⁶ Minitö iñömö æbämë pöni cæmïni awædö. Mönö Codito waadete pönö cæcä beyænque mïnitö Wængongui añecä pömïnitawo. Ñöwo guiquënë në añecä iñongante quïmæ panguïmæ gomïni. Wadäni, Quëwenguï taadö wadö inompä, ante tededäni ëñëninque mïnitö do Ao änewëmïni awædö. ⁷ Iñæmpa wadö incæ wïi quëwenguïnö inompä. Wæætë edæ, Minitö oda cæcæmïnimpa, ante cædinqe wadäni pancadäniya, Codito ingantedö ante watapæ möni apænedö ante edæ, Idiquibæ bacæimpa, ante cædäni apa ëñëwëmïni.

⁸ Mönitö Codito ingantedö ante watapæ apænemöni ëñëmïnitapa. Incæte mönitö adomöni incæ wadö ante apænemöni bai Wængongui wæætë pönö piinte apænte angä wæquïmönidö angüënë. Ayæ adobai Wængongui anquedo incæ öönädë owodinqe wææ pöninque wadö ante apænecä bai Wængongui tömengä ingante wæætë godö piinte apænte angä wæquingänö angüënë. ⁹ Edæ doyedë möni änïnö bai botö ñöwo wæætë adodö ante ämopa. Codito ingantedö ante watapæ apænemöni ëñëninque mïnitö Ao ämïnitawo. Inique mänïnö ante æcämenque pönënamäi inte wadö ante apænecä ëñëninque Wængongui tömengä ingante

wæætë godö püinte apænte angä wæquingänö anguënë.

¹⁰ Botö dicæ, Minitö waomînique botö ïmote Ao ancæmînipa, ante apænebogaa. Wængonguinque, Ao ancæcäimpa, ante apænebo aedäni. Ayæ, Waomînique tocæmînipa, ante dicæ cæbogaa. Waomînique tocæmînipa, ante cæbo inte bai edæ Codito ingante nê cædömo inämaï incædömoimpa.

Pabodo Wængonguinque da godongä gotabopa, angampa

¹¹ Botö tönîñamîni ëñëedäni. Codito ingantedö ante watapæ botö apænedö iñömö edæ wüi waodänique nâni mä pönengainö impa, ante ämo ëñëedäni. ¹² Mäninö ante waocanque dicæ pönö apænecä ëñente æntabogaa. Waocanque dicæ odömonte apænecä ëñëinique apænetabogaa. Wæætë Itota Codito edonque odömonte apænecä ëñëinique botö nê æmo inte adodö ante apænebopa.

¹³ Oodeobo inömö inte botö iñömö edæ möni oodeocabo pönengainö ante wëenëñedë mäninonque ante ëñëinique quëwengaboï aedäni. Botö mäniñedë edæ Codito ingante nâni godongämæ pönencabo inänite wido cæcæte ante cædinque ancaa togænte edæ nanguï pönï pämo wægädänimpa, ante do ëñëminipa. ¹⁴ Ayæ botö tönö guëa pægäinâni incæ nanguï inâni guiquënë möni oodeocabo möni ëñengainö ante wædænque ëñente cæyönâni botö iñömö godömenque nanguï pönï ëñente cægaboimpa. Edæ mönitö mæmæidi nâni odömonte angainö ante botö, Mönö Ao ante

adodö eñente cæte quëwengæimpa, ante nanguï cæbo ingaboimpa.

¹⁵ Incæte botö badä cæncadë ongöñömote Wængonguï, Botö beyæ cæcæbiimpa, äinique edæ mäniñedë botö imote apænte ængaingä inte ñowo botö imote pönö waadedingue añecantapa. Ayæ ñowo pönï tömengä nämä nänö pönënö ante cæte todingue edæ, ¹⁶ botö imote pönö angantapa. Bitö oodeoidi inämaï inäni inänite apænebi eñëningue tömënäni botö Wengä ingante edonque ate bai ëwocacædänimpa, ante täno botö imote edonque odömongä adingue botö tömengä Wengä ingante do ëwocabo inte apænebo eñënänitapa. Ìinique botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö në da godongainäni inänite apænecæte ante Eedotadëe iñömö æidämaï intabopa. Wæætë edæ wadæ godingue botö wayömö Adabiabæ do godingue ayæ ate Daämaco iñömö ocæ ëmænte gotabopa.

¹⁸ Ayæ wadepo mënepoga go adodepoque ìinque go ate botö Pegodo weca mä eñacæte ante Eedotadëe æidämaï mæa Wængonguï itædë tömengä weca quëwentabopa. ¹⁹ Ayæ wadäni Itota nänö në da godongainäni iñönänite botö adocanque ingante mönö Awënë Itota biwï Tantiago ingante adingue wadäni inänite adämaï intabopa. ²⁰ Mänömainö ante botö Wængonguï ayongä babæ änämaï inte näwangä ante yewæmömo aedäni.

²¹ Mänii gote eñate ate botö Tidiabæ godingue godömenque Tiditiabæ gotabopa. ²² Ìinique Oodeabæ quëwente Codito ingante nänï

godongämæ pönencabo mönō Codito nempo nē quēwēnāni iñōmō botō awinca cōwē adāmaī ināni inte önōwēnenque pōnengadānimpa. ²³ Tōmēnāni iñōmō iīmaīnō ante önōmoncaque ēñengadānimpa. “Wēēnēñedē mönō imonte nē togænte pangaingā iñōmō mönō pōnente quēwenguīne ante, Mānīne ante wido cæcæimpa, angantawo. Nōwo guiquēnē tōmengā, Wido cæquīne, ante nānō angāine incæ adode ante edæ watapæ apæneca ēñēnānīpa,” ante tededāni ēñengadānimpa. ²⁴ İninque, Pabodo nōwo waa cæcampa, ante adinque tōmēnāni Wængonguī ingante apænedinque, Bitō waēmō pōnī emōnōmi inte nē waa cæbi imīpa, ante watapæ apænegadānimpa.

2

Itota nānō nē da godongaināni Pabodo ingante Ao ānāni

¹ Ayæ mānīī pō godinque iīncayæ ate catodote wadepo go ate botō Bedēnabee tōnō Eedotadēē iñōmō adodō æidinque Tito ingante māomōna gocantapa. ² Wængonguī do botō imote apænete bai edonque odōmongā adinque botō Eedotadēē iñōmō æidinque iīmaī ante apænetabopa. Botō iñōmō oodeoidi ināmaī ināni weca godinque, Codito ingantedō ante cōwē watapæ apænebopa, ante botō nænænānique inānite awēmō apænebo ēñēnānitapa. Mānōmaī cædinque botō, Æbānō cæboī, ante adodō adodō ante apænebo ēñēninque tōmēnāni pīināmaī incædānimpa, ante cætabopa.

³ Ayæ, Botō tōnō guēa pōningā Tito ingante adinque pancadāniya, İngā iñōmō Guidiego inongā

iñongante ämïni ëö togæncædänimpa, ante pïinte änäni incæte nē änäni guiquënë, Eö togæedäni, ante änämaï inänitapa. ⁴ Eö togængæimpa, ante nē pïinte änäni nāni wææ angainö ante mönitö iñömö Codito Itota gä pe æmpote æængä beyænque abæ tawænte ee gote bai quëwëmönipa. Mänömaï iñömönte pancadäniya, Æbänö quëwënänii, ante edæ awëmö acæte ante cædinque edæ, Mönö caipæ imompa, ante bai babæ cædinque mönitö weca pönäni wætamönipa. Ayæ edæ mönitö tömënäni nāni wææ änö beyænque nē cæte quëwëmöni bacæmönimpa, ante cædinque tömënäni godömenque, Cæedäni cæedäni, ante wææ anewënäni wætamönipa. ⁵ Incæte edæ, Mönö Codito ingantedö ante watapæ möni apænedö näwangä ante impa, ante mïnitö oda cædämaï incæminimpa, ante wææ cædinque mönitö wantæ iñö incæ nē wææ anewënäni inänite ëñente cædämaï intamönipa.

⁶ Nænænäni inänipa, ante wadäni nāni nē waa adönäni iñömö æbämë ëmönänii, ante botö iñömö edæ wædämaï imopa. Edæ Wængongui incæ waocä ingante apænte acæte ante cædinque adämaï ingampa. Mimönoque acampa. Ìniquè botö idæwaa apænebo ate iinäni incæ ædö cæte godömenque apænequïnäni. ⁷ Iñæmpa iinäni incæ edæ do ëñänitapa. Pegodo ingante mönö Awënë incæ pönö angä ate tömengä oodeoidi inänite mönö Awënë ingantedö ante nē watapæ apænecä ingampa. Botö imote adobai mönö Awënë incæ pönö angä ate botö wæætë oodeoidi inämaï inäni inänite nē apænebo imopa. Ìniquè botö

mänömainö ante apænebo ate nē änāni iñömö, Pegodo cæcä bai Pabodo adobaï cæcampa, ante do eñenānitapa. ⁸ Pegodo oodeoidi weca gote cæyongante Wængongui tōmengä tönö godongämæ cæcä bai botö guiquēnē oodeoidi ināmaï ināni weca edæ gote cæyōmote adocä incæ botö tönö adobaï edæ godongämæ cæcampa, ante do eñenānitapa.

⁹ Tantiago, Pegodo, Wäo iñömö nē tæï emönāni inānipa, ante adinque wadāni, Gönönīwæ onguitanca bai inānipa, ante apænedānipa. Ininque botö apænebo eñenīnque mänināni, Onguitancaidi, nāni änāni iñömö edæ, Pabodo ingante Wængongui mänömaï pönö waadete cæcampa, ante adinque botö imote ayæ Bedēnabee ingante, Mönitö tönīñamīna imīnapa, ante tōmēmæ inö pædæ pompote bæi ongompodānitapa. Ayæ, Mönitö oodeoidi weca gote apæneyōmōni mīnitö wæætē oodeoidi ināmaï ināni weca gote apænecæmīnīmpa, ante godongämæ Ao änānitapa. ¹⁰ Ayæ, Mīnitö nē ömaadāni inte wædāni inānite ante cōwē pönēninque waa cæcæmīnīmpa, äninque mäninque ante wææ änānitapa. Mäninö nāni äninö incæ botö cōwē pönēninque edæ nanguï cæinente wæbo intabopa.

Pegodo ingante Pabodo angä wæcampa

¹¹ Ayæ Pegodo Antioquiya iñömö pöninque wīi nō cæcä adinque botö tōmengä awinca waa adinque, Bitö pante wæquinque wënæ wënæ cæbi imīpa, ämo wæcantapa. ¹² Iīmaï edæ Pegodo cæcä inongäimpa. Tæcæ Antioquiya pöninque tōmengä oodeoidi ināmaï ināni weca wæætē wæætē pō guī pō guī ongōninque godongämæ cænongäimpa. Incæte Tantiago nänö

da pönöninäni pönäni ate Pegodo iñömö edæ, Mönö
 eö togængæimpa, ante nē änönäni piinäni wæcæ
 wæ, ante guiñēnongä inte edæ oodeoidi inämaï
 inäni weca ñowo cænämaï inte edæ gomonga gote
 cæñongäimpa. ¹³ Mänömaï wadonque cædingä
 inte ñowo wadonque cæyongante tömengä tönö
 oodeoidi tömänäni wadonque cædinäni inte edæ
 ñowo wæætē wadonque cædänipa, ante adinque
 Bedēnabee incæ oda cæte wapiticæ cæcantapa.

¹⁴ Ìinque edæ Codito ingantedö ante watapæ
 mönö eñēnō nō pönī i incæte tömēnāni nō cædämaï
 inte wapiticæ cædänipa, ante adinque botö
 tömänäni ayönäni edæ Pegodo ingante iïmaï
 ante ämo wæcantapa. “Bitö iñömö oodeobi inömi
 inte edæ oodeo inämaï inäni bai ñimpo cæte
 quēwēninque edæ wii oodeoidi nāni wææ angainö
 ante eñente quēwēmipa. Incæte bitö, Oodeo inämaï
 inäni incæ oodeoidi nāni wææ angainö ante eñente
 quēwencædänimpa, ante quimæ wææ anewēmii,”
 ämo wæcantapa.

*Mönö pönēnō beyænque mönö tömämö
 quēwēmompa*

¹⁵ Oodeoidi inämaï inäni nāni eñēnämaï
 quēwencabo bai inämaï imöni inte mönitö iñömö
 edæ oodeomöni nē eñagaimöni imönipa. ¹⁶ Incæte
 edæ iïmaï ante do eñēmönipa. Iïmaï cædäni, ante
 Möitee wodi nänö wææ angainö ante eñente cæcä
 beyænque waocä dicæ Wængongui ayongä edæ
 nō cæcä baquingä. Wæætē Itota Codito ingante
 wede nänö pönēnō beyænque waocä nō cæcä
 bacampa, ante mönitö do eñēmönipa. Ìinque,
 Waocä æcämenque incæ mäninö Möitee wodi nänö

wææ angainö ante tömengä nänö eñente cædö beyænque edæ nö cæcä badämaï incæcäimpa, ante do eñëmöni inte mönitö adobaï, Ædö cæte mäninö beyænque nö cæmöni baquïmönii, ante eñëmönipa. Wæætë, Codito ingante möni wede pönënö beyænque nö cæmöni bacæte ante mönitö adobaï tömengä ingante wede pönëmönipa.

¹⁷ Ìninqe mönitö oodeoidi ïmöni iñömö, Mönö Codito nempo quëwëninque Wængonguï ayongä mönö nö cæmö bacæimpa, ante cæmönipa. Mänömainö ante cædinque mönitö në wënæ wënæ cæmöni inte wæmöni incæte dicæ Codito angä beyæ wënæ wënæ cætamöniyaa. ¹⁸ Mäninö Mõitee wodi nänö wææ angainö ante eñente cæte quëwengæimpa, ante botö pönengainö ante do wido cægaboimpa. Mänömainö ante botö pönengainö ante në wido cægaimo inte botö ædö cæte wæætë adodö ænte baï cædinque, Mäninö ante eñente mönö quëwengæimpa, ante anguïmoo. Mänömainö ante ämo inte baï botö Wængonguï nänö wææ angainö ante edæ në eñënämaï ïmo bacædömoimpa. ¹⁹ Edæ, Wængonguï nänö wææ angainö ante ædö cæte tömänö ante eñente cæquïmoo, ante botö wædö beyænque në wæwocaimo bagaboimpa. Ìninqe botö në wæwocagaimo ïnömo inte mänine ante eñente cæcæte ante quïnante wæquïmoo. Wæætë edæ Wængonguï beyænque ante botö quëwenguïnque ïmopa.

²⁰ Mönö Codito ingante awäa timpodäni wæñongante botö tömengä tönö godongämæ wænte baï bagaboimpa. Ìninqe botö baonga eñate quëwëmo incæte botö wii tömömo quëwenguïmämo

ēwocate quēwēmopa. Wæætē Codito nānō quēwenguīmāmo ēwocate quēwēmopa. Īninqe adocā Codito Wængonguī Wengā botō ĩmote waadete pōnēninqe nāmā tōmengā wepæ ante, Wængonguī quī, ante botō beyæ pædæ godongā adinqe botō baō ēñate quēwēninqe tōmengā ingante wede pōnēninqe quēwēmopa. ²¹ Īninqe, ĩmaī cæedāni, ante Mōitee wodi nānō wææ angainō ante ēñente cædinque mănōmainō cæmō beyænque ñā mēnongate nō entawēmō bamō bai mōnō Codito ōnonque pōnī wæncægacāimpa. Mănōmaī beyæ Wængonguī nānō pōnō waadete cægainō ante botō Ao ante ō æninqe cōwē wido cædāmaī ĩmopa.

3

Mōnō pōnēnō beyænque mōnō quēwengæimpa, ante

¹ Gadataidi ōnonque pōnī mīni cæcabo ĩnōmīni inte ēñēedāni. Æcānō wadō ante apænecā ēñēninqe mīnitō dowænte bai ōnonque tedewēmīnīpa. Īñæmpa botō doyedē, Itota ingante æbānō awāa timpodāni wængacāī, ante botō edonque pōnī odōmonte apænebo ēñēninqe mīnitō ōnōwēnenque ante bai do pōnēmīnitapa. ² Adodeque āmo ate apænemīni ēñēmoedāni. Mīnitō Wængonguī Ōnōwoca ingante æbānō cæte æmīnīi. Mōitee wodi wææ nānō angainō ante ēñente mīni cædō beyæ mīnitō tōmengā ingante æmīnitawogaa. Wæætē edæ mōnitō apænemōni ēñēninqe wede pōnēmīni inte æmīnitawo.

³ Ìñæmpa mímö ömædë ìmìni inte ëñënämaï incædö. Mìnitö wëenëñedë mä pönì pönëninque Wængonguï Öñowoca tönö nè cægaïmìni inte ñöwo wæætë edæ ömæwocamìni inte baï edæ baonga ëñadinque nāmanque cædinque ìnque cæmìni. ⁴ Wængonguï nangui pönì pönö cæcä caate wædinque mìnitö önonque beyæ caate wæmìnitawo. Tömengä dicæ önonquedö ante cæcæte ante pönö cæcä wæmìniyaa. ⁵ Wængonguï tömengä Öñowoca ingante da pönöninque mìnitö weca bamönengæ pönì cæcampa. Quinante mänömaï cæcää. Edæ, Möitee wodi nänö wææ angainö ante ëñente mìnì cædö beyæ ante dicæ cæcää. Wæætë mönitö apænemöni mìnì ëñente pönënö beyæ Wængonguï tömengä Öñowoca ingante da pönöninque mìnitö weca bamönengæ pönì pönö cæcä æmìnipa.

⁶ Wængonguï apænecä ëñëninque Abadäo wodi, Nöngä ante apænecampa, ante wede pönengacäimpa. Ìnque tömengä wede nänö pönënö beyænque Wængonguï, Botö ayömo Abadäo ìñömö nè nö cæte quëwëngä ingampa, angacäimpa, ante yewæmongatimpa. ⁷ Mänömainö ante adinque mìnitö ìmaï ante ëñëedäni. Mönö nè wede pönëmö ìñömö Abadäo wodi pæimö baï adomö ìmompä, ante ëñente pönëedäni. ⁸ Wængonguï, Oodeoidi ìnämaï ìnäni incæ wede nänì pönënö beyænque botö ayömo edæ nè nö cæte quëwënäni bacædänimpa, ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænëdinque tömengä, “Botö bitö ìmite pönö waa pönì cæbo æmi ìnque bitö

beyænque wadäni nāni cabo wadäni nāni cabo tōmancabodāniya edæ watapæ quēwenguinānidō anguēnē,” ante apænegacäimpa. Mänömaï impa, ante yewæmōninque dodäni wēēñēñedē pōñi Wængonguï waa pōñi nānō cæquinō ante yewæmongadānimpa.⁹ Abadäo wodi cōwē ædæmō cæte pōnengaingä iñongante Wængonguï pōnō waa pōñi cægacäimpa. Mönö nē wede pōnēmō iñömōnte tōmengä adobaï pōnō waa pōñi cæcä æninque mönō iñömō edæ Abadäo wodi tönō godongāmæ watapæ quēwēmō imönō anguēnē.

¹⁰ Wæætē edæ, “Wææ ante botō yewæmongainta adinque æcänō tōmänō ante dicæ cæcää tōmengä iñömō Wængonguï pīinte angä wæwocaingä ingänō anguēnē,” ante Möitee wodi incæ do yewæmongacäimpa. Ìninque Wængonguï edæ nānō wææ angainō ante waodäni, Botō ēñente cædō beyænque quēwencæboimpa, ante nē änewēnāni incæ wīi eyepæ ēñente cædāni inönāni inte tōmēnāni tōmänāni inānite Wængonguï pīinte angä wæwocaināni inānidō anguēnē. ¹¹ Ayæ wacä Wængonguï beyæ yewæmōninque, “Nē nō cæte quēwēnongä incæ tōmengä nānō wede pōnēnō beyænque quēwencæcäimpa,” angacäimpa. Ìninque iïmaï ante mönō edonque ēñengæïmpa. Möitee wodi nānō wææ angainō ante ēñente cæte beyænque waocä dicæ Wængonguï ayongä nē nō cæcä badinque quēwenguingää. ¹² Wængonguï nānō wææ angainō ante ēñente quēwengæïmpa, ante nē cædönāni iñömō tōmēnāni dicæ nāni wede pōnēnō beyæ quēwēnāniyaa. Wæætē, “Mäninō ante nē ēñente cæcä iñömō tōmengä nānō ēñente cædō beyænque quēwencæcäimpa,” ante Möitee

wodi nänö yewæmonte angainö bai impa.

¹³ Ayæ adobai, “Æcänö ingante awäa wodoncädäni a ongöna tömengä ingante Wængongui pïngä wæwocaingä ingänö anguënë,” ante Möitee wodi yewæmongacäimpa. Ìninqe Wængongui nänö wææ angainö ante wii eyepæ ëñente cæmö beyæ mönö wæwocaimö inte wæyömonte mönö Codito iñömö, Abæ tawænte gote bai quëwencæminimpa, ante cædinque mönö beyæ wæætë wæwocaingä badinque edæ awäa wæninque a ongongacäimpa. ¹⁴ Abadäo wodi ingante Wængongui waa pönï pönö cægacäimpa. Ayæ, minitö oodeoidi inämaï iñöminite Itota Codito pönö cæcä beyænque Abadäo tönö godongämæ watapæ quëwencæminimpa, ante Wængongui adobai pönö waa cæcampa. Mänömaï bacäimpa, ante cædinque Codito tömämö ìmonte, Minitö wede pönëninque botö Önöwoca ingante ænte ëwocacæminimpa, ante cædinque mönö ìmonte æncæte ante nämä wepæ godonte ængä beyænque quëwëmompä.

Wængongui täno, Cæquïmo, aninque ayæ ate wææ angacäimpa

¹⁵ Botö tönïñamïni ëñëedäni. Botö, Waomö mönö cæï bai Wængongui mönö beyæ wodo adobai cæcampa, ante odömoncæte ante iïmaï ante yewæmömo aedäni. Waoda, Möna guëa cæcaya ìmönapa, ante Ao äna ate adocanque inte ædö cæte wadö ante cæquëngää. Ayæ, Mönö godömenque cæcäimpa, ante waocä adocanque inte ædö cæte edæ ante cæquëngää. Ñöwo edæ ämo ëñëedäni. Wængongui, Mönö godongämæ cæcabo bacäimpa,

ante botö pönö cæcæboimpa, angä ëñëninque mönö
 Ao ante cæquënönö iñömö edæ wodo adobaï impa.
 16 Mæmæ Abadäo wodi ingante apænedinque
 Wængongui, Bitö Pæingä ingante botö cöwë pönö
 waa cæcæboimpa, angacäimpa. Mänömaï äninque
 tömengä Abadäo wodi ingante, “Bitö pæïnäni,”
 ante änämaï ingacäimpa. Wæætë, “Bitö Pæingä
 ingante pönö cæcæboimpa,” äninque Abadäo
 wodi Pæingä adocanque Codito ingante ante
 pönëninque angacäimpa.

17 Mänömainö ante apænedinque botö iïmainö
 ante odömoncæte ante apænetabopa. Abadäo
 wodi ingante Wængongui, Botö pönö cæbo ate
 mïnitö Ao ämïni ïninque mönö godongämæ waa
 cæcæimpa, ante wëenëñedë cægacäimpa. Ayæ
 wantæpiyæ coatodo tiento todëinta wadepo go
 ate Möitee wodi ingante apænedinque adocä,
 Iïmaï cæedäni, ante pönö wææ änongäimpa. ïninque
 Wængongui wantæpiyæ ate wææ äninque do nänö
 angaine ante wëä godönämaï ingacäimpa. Edæ,
 Cöwë pönö cæcæboimpa, ante doyedë në angaingä
 inte tömengä ñöwo wææ äninque mänine ante
 dicæ wëä godongantawogaa. 18 Möitee wodi
 nänö wææ angainö ëñente cæmö beyænque mönö
 ænguënencoo do æmö baï Wængongui, Cöwë pönö
 cæcæboimpa, ante önonque ancægacäimpa. Incæte
 Wængongui pönö waadete cædinque mæmæ
 Abadäo wodi ingante apænedinque, Cöwë pönömo
 æncæminimpa, ante nänö angainö baï cædinque do
 cægacäimpa.

19 ïninque, Cöwë pönömo æedäni, ante në
 angaingä inte Wængongui quïnante ñöwo wæætë,

Īīmaī cæedāni, ante wææ angacāi. Īñæmpa tōmengā, Minitō botō änō ante ēñēnāmaī cædinque wēnæ wēnæ mīni cædinō edonque bacæimpa, ante odōmoncæte ante wææ angacāimpa. Mānōmaī cædinque tōmengā, Abadāō wodi Pæingā botō nē angaingā incæ tōmengā nānō ponganca mīnitō ēñente cædinque quēwencæmīnimpā, ante wææ angacāimpa. Mānīne nānō wææ angāine ēñente cæcædānimpā, ante Wængonguī tōmengā anquedoidi inānite da pōnongā pōnīnque tōmēnāni Mōitee wodi ingante māmō odōmōnāni agacāimpa. Tōmengā iñōmō tæcæguedē ongonte baī nē anguingā badīnque Wængonguī nānō angāine ante idægoidi inānite wæætē angā ēñengadānimpā. ²⁰ Ñōwo apænebo ēñēedāni. Adocanque eyepæ cæcā adīnque tōmengā beyæ ancæte ante wacā tæcæguedē ongōnāmaī īmaingampa. Wængonguī iñōmō, Cōwē pōnō cæcæboimpa, nē angaingā inte adocanque incæ eyepæ cædongā ingampa.

Īīmaī cæedāni, ante quīnante angacāi, ante

²¹ Īnīnque Wængonguī, Cōwē pōnō cæcæboimpa, ante nē angaingā inte wantæpiyæ ate, Īīmaī cæedāni, ante wææ ānīnque tōmengā doyedē nānō angāine dicæ wēā godongantawogaa. Edæ tōmengā mōnō īmonte apænedīnque, Botō wææ angāinō beyæ quēwencæmīnimpā, ante mānīne pōnongā ænte quēwēmō baī mānīne beyænque edæ nē nō quēwēmō bacædōmōimpa. Wæætē edæ wīī mānōmaī impā. Wængonguī, Cōwē pōnō cæcæboimpa, angā ēñēnīnque mōnō quēwenguīnque edæ nē nō cæmō bamompa. ²² Īnīnque Wængonguī, Cōwē pōnōmo æncædānimpā, ante nē angaingā

inte iīmaī ante cæcampa. Botō angaincoo ante Itota Codito ingante nē pōnēnāni inānite da pōnōmo ate tōmēnāni wede nāni pōnēnō beyænque ænte ēwocacædānimpa, ante iīmaī cæcampa. Tōmengā mōnō inguipoga tōmāo quēwēmō mōnō wēnæ wēnæ cædimāmo adinque mōnō imonte pōnō tee mōnete bai cæcā ongōmompā. Mānōmaī pōnō cæcā ongongaimō iñōmonte Wængonguī mōnō wede pōnencabo adomonque iñōmonte tōmengā nānō angaincoo ante pōnongā ænte ēwocamompā. Wængonguī, Mānōmaī cæbopa, ante apænecā ēñēninque yewæmongadānimpa.

²³ Doyedē iñōmō mōnō, Mōitee wodi nānō wææ angainō tōmānō ante mōnō ædō cæte eyepæ cæquiī, ante tee mōnete bai wægāmōimpa. Edæ Itota Codito mōnō nē wede pōnēnongā edonque pōnī nānō ponte a ongonganca mōnō tee mōnete bai wægāmōimpa. ²⁴ Iñinque, Mīnitō Codito ingante wede pōnēninque nē nō cæmīni bacæmīnimpa, ante cædinque Wængonguī Codito gāmænō tōō æmænte bai cædinque wææ angacāimpa. Mānōmaī i iñinque tōmengā nānō wææ angainō beyænque mōnō wapiticæ godāmaī inte Codito gāmænō pongāmōimpa. ²⁵ Ayæ ñōwo iñōmō, Mōnō nē wede pōnēnongā do pongāimpa, ante adinque Wængonguī ñōwo wæætē wææ ānāmaī ingampa.

²⁶ Mīnitō Itota Codito ingante wede pōnēmīni inte tōmāmīni Wængonguī wēñæmīni imīnipa. ²⁷ Edæ tōmāmīni mōnō Codito tōnō godongāmæ guuite bai æpænē guiidinque tōmengā nānō ēwocadō adodō ēwocadinque tōmengā nempo quēwēmīnipa. ²⁸ Tōmengā nempo adocabomō

inömö inte mönō adocanque ingantedō ante apænedinque, Oodeocā ingampa, ante änāmaï ingæimpa. Ayæ wacā ingantedō ante adobaï, Guidiego ingampa, ante änāmaï ingæimpa. Ayæ, Waocā nänō nē ö æningä inte awënë beyænque cæte nē quëwengä ingampa, ante mönō änāmaï ingæimpa. Wacā ingantedō ante, Abæ tawænte gocā ingampa, ante mönō änāmaï ingæimpa. Ayæ adocanque ingantedō ante, Onguïñængä ingampa, ante mönō änāmaï inte wacā ingantedō ante adobaï edæ, Onquiyængä ingampa, ante änāmaï ingæimpa. Ìñæmpa Codito Itota nempo quëwëninque adocabomō imompa. ²⁹ Ayæ mīnitō ìñömō Codito nempo quëwëmīni inte mæmæ Abadäo wodi pæimīni baï imīnīpa. Ìnīnque Wængonguï nänō, Cöwë pönōmo æncæmīnīmpa, ante nänō angaincoo ante mīnitō nē ænguimīni imīnīpa.

4

¹ Mäninō ante yewæmōninque botō, Waodāni æbänō cædānīi, ante odömōninque ìimaï ante apænecæte ante yewæmōmopa. Wæmpocā wængä ate tōmengä wengä ìñömō wæmpocā nänō ëadincoo nē ænguingä ingampa. Ìnīnque wæmpocā ayæ mīingä quëwengäñedë mänincoo tōmancoo do ænte baï tōmengä wengä nē ëacā ingampa. Incæte tōmengä wengä tōmancoo nē ëacā incæ edæ tōmengä wëñængäñedë guiquënë wæmpocā beyænque cæte nē quëwengä baï inongä ingampa. ² Ìnīnque wæmpocā do änīnque, Ìionæ iinque bayonte botō wengä do picængä badinque

nämä nē angä bacæcäimpa, ante nänö angaiönæ iinque baganca nē aadäni inänite wæpocä angä eñëninque tömënäni wæætē wēñængä ingante wææ aadänipa. Ayæ, Wēñængä nänö manguincoo ante æbänö cæquii, ante nē aadänique änäni eñente wēñængä incæ cæcampa.

³ Mönö iñömö doyedē mäningä wēñængä bai adobai picæmō inämaï mönö ingaiñedē inguipogaque nāni wææ angaiñonque ante eñente cægamöimpa. Waocä beyænque cæte nē quëwengä bai mönö adobai inguipogaque nāni wææ angaiñonque ante eñencæte ante cædinque mäninö beyænque cæte nē quëwëmö bai inte wægamöimpa.

⁴ Incæte Mæmpo Wængongui iñömö, Iiönæ da pönömo poncæcäimpa, ante doyedē nänö angaiönæ iinque bayonte tömengä Wengä ingante da pönongä pongacäimpa. Iingä Wēñængä ingante onquiyængä mangä eñadinque tömengä Wængongui nänö wææ angainö ante nē eñente cæquënengä nänö baquinque pægacäimpa. ⁵ Iinque mönö Möitee wodi nänö wææ angainö beyæ tee mönete bai wæyömonte adocä Wængongui Wengä incæ, Minitö abæ tawænte bai picæmini badinque näwä wëmini bate quëwencæminimpa, ante mönö imonte ængä beyænque mönö abæ tawænte bai quëwëmompa. ⁶ Mæmpo Wængongui iñömö, Minitö näwä wëmini imini beyæ, ante tömengä Wengä Önöwoca ingante mönonga da pönongantapa. Iinque tömengä Önöwoca iñömö, “Mæmpo, botö Wæmpo,” ante nē apænecä inongä inte mönö mimönë owodinque adodö ante mönö beyæ apænecampa.

7 Īninqe bitō iñōmō bitō ĩmite nē wææ angaingā beyænque idæwaa cæte quēwengāimi inte ñowo abæ tawænte bai æmæwo pæðimi inte nāwā wēmi iñōmi ĩmipa. Ayæ nāwā wēmi iñōmite Wængonguī pōnō cæcā ate bitō tōmengā nānō ēagaincoo ante nē ænguīmi babipa.

Nē pōnēmīni æbāmē cæte quēwēmīni, ante wæcampa

8 Wængonguīidi iñāmaī iñōnānite wadāni iñōmō, Wængonguīidi iñānīpa, ante babæ apænedānīpa. Mīnitō wēēnēñedē Wængonguī ingante mīni adāmaī iñedē, Wængonguīidi, ante tōmēnāni babæ ante nāni nē ānōnāni beyænque cæte nē quēwēmīni inte ñæ cæyænte bai wægāmīnīpa. 9 Ñowo iñōmō mīnitō Wængonguī ingante ate bai nē pōnēmīni ĩmīni inte ædō cæte wapiticæ ante ēñēmīnīi. Æ wadō ante godōmenque āmo. Wængonguī incæ mīnitō ĩmīnite do ate pōnengaingā ingā incæte mīnitō ædō cæte inguipogaque quēwēnāni nāni ōnonquedō ante wææ angainō ante ēñente quēwēmīnīi. Īñæmpa, Mānīne nāni wææ angainō ante wæætē ēñengæīmpa, āninqe mīni ñā cæpote wæquinque āmīni awædō. 10 Edæ Wængonguī ānāmaī iñongante mīnitō mā pōnēninqe, Wængonguī beyæ, ante mōnō iñōnæ cædāmaī inte ongōninqe ææmæ cæte becæīmpa, ānewēmīnīpa. Ayæ, Īi apāicā iñonte adobaī, iintedæ iñonte adobaī, iñepo iñonte adobaī, Wængonguī beyæ, ante mōnō cædāmaī inte ææmæ cæte becæīmpa, ante ōnonque pōnī ante cæmīnīpa tōō. 11 Īninqe, Mīnitō ēñēnāmaī inte mīni wæquinque cæmīnīpa, ante adinqe botō mīnitō beyæ ante

guiñente wæbopa. Botö pönö nangui cæbo incæte edæ önonque wabänö cægaboimpa, ante wæbopa.

¹² Botö töninamini eñeedäni. Botö wëenëñedë minitö bai Möitee wodi nänö wææ angainö në cæbo bai inte wæbo aminitawo. Wæætë botö në wææ angaingä ingante idæwaa eñente cædinque abæ tawænte gobo bai minitö adobai cæmini waa tobaimopa. Minitö dicæ botö imote wënæ wënæ cæminitawogaa. ¹³ Wëenëñedë wënæ wënæ mänimo inte botö mänömai beyæ minitö weca pöningue mönö Codito ingantedö ante watapæ apænedinque mä apænebo eñëminitapa. ¹⁴ Ininque mänömai wënæ wënæ bate pömo ate wædimini incæte minitö guiñëñate wädämai inte towæ tänongadämai iminitapa. Wæætë edæ botö imote adinque minitö, Wængongui anquedo ingampa, ante pönente bai cædinque watapæ todinque, Pöe, äminitapa. Ayæ edæ, Itota Codito ingampa, ante pönente bai cædinque, Pöe, äminitapa. ¹⁵ Minitö mäninñedë watapæ mini todinö bai ñöwo guiquënë quimæ todämai iminii. Minitö mäninñedë edæ eyepæ inte bai nämä awinca o togæmöninque botö imo pönö mine timoncædöminimpa, ante pönëninque apænebopa.

¹⁶ Inæmpa minitö iminite näwangä apænebo beyænque minitö ñöwo wæætë botö imote piinte baminitawo. ¹⁷ Wadäni inñömö, Mönitö gämænö ponte eñeedäni, ante nangui cädäni inñömö minitö iminite wënæ wënæ cæcæte ante anewänänpa. Tömänäni inñömö, Pabodoidi inänite eñënëmai inte minitö wæætë mönitö tönö godongämæ cædinque mönitö cæinënonque ante ämöni eñëninque cæcæminimpa, ante babæ cädänipa.

18 Wacä nänö cæinënö ante godongämæ cæmīni cōwē waa īmaimpa. Nāwangä impa. Incæte tōmengä nänö waa cæquēnēnonque ante cæcä adinque mīnitō, Mānīnonque edæ cæcæimpa, ante nanguī cæquēnēmīni īmīnīpa. Ayæ edæ botō mīnitō weca quēwēmoyedē cæmīni bai mīnitō botō dæ ämo īñedē cōwē adobai cæmīni waa īmaimpa. 19 Botō wēmīni ēñeedāni. Yædēmadā inte nantate wädä bai botō īñōmō wæætē nantate wædinque edæ, Mīnitō mīmōnē Codito ingante ædæmō entawencæmīnīpa, ante nanguī pōnī cædinque wæbopa. 20 Edæ, Mīnitō æbāmē cæmīnī, ante ēñēnāmaī īmo inte botō mīnitō weca pōnīnque wīi gobæ tedete botō änō bai tededinque wæætē wadō bai tedecæte ante pōinente nanguī wæbopa.

Tada wodi tönö tōmēnä īnante nē cægaingä Agada

21 Mīnitō, Mōitee wodi nänö wææ angainō ante mōnō ēñengæimpa, ante nē ämīni inte apænēmīni ēñēmoedāni. Mīnitō wææ ante tōmengä nänö yewæmongainta incæ adāmaī inte ēñēnāmaī īmīnitawo. 22 Īmaī ante yewæmongatimpa. Abadäo wodi īñōmō wēñæna onguīñæna mēnaa īnate tapæigacäimpa. Adocanque guiquēnē nänōogængä beyænque nē cæte quēwengä wēñængä īñongä wacä guiquēnē nāwä nänōogængä wēñængä ingacäimpa. 23 Nē cæte quēwengä wēñængä guiquēnē cōwē mōnō ēñadō bai adobai ōnonque ēñagacäimpa. Nāwä nänōogængä wēñængä guiquēnē Wængonguī, Cōwē pōnōmo æncæbiimpa, ante nänö ānīnō beyænque ēñagacäimpa.

24 Wængonguĩ iñömö, Botö pönö cæbo ate
 mīnitö Ao ämīni iñinque mōnō godongämæ waa
 cæcæimpa, ante mempoga apænecäimpa.
 Īnīnque, Wængonguĩ mēnea nānō apænegaīnō
 æbānō īnei, ante ēñencæte ante mōnō māñina
 onquiyæna īnate adīnque pōnengæimpa.
 Wængonguĩ iñömö adopoque apænecæte ante
 Tīnaiquidi wæænte ongōnīnque wææ angacäimpa.
 Māñineque tōmengä nānō wææ angaīneque ante nē
 ēñente cædāni iñömö Agada wodi wēnāni māñine
 beyænque nē cæte quēwēnāni bai nāni baquinque
 ēñadānīpa. 25 Māningä Agada tōmengä nāni
 wencabo iñömö wacā ingante nē cædōnāni inte
 cæningä ñā cæyænte bai inte wægadānīpa. Īnīnque
 Adabiabæ ongonquidi Tīnaiquidi ongōnīnque
 Wængonguĩ wææ angä ate mōnō iñömö Agada
 bai wacā ingante nē cæmō bagamōimpa. Edæ
 Agada wodi nāni wencabo wacā beyænque nē
 cæte quēwēnāni inte nāni wægānō bai ñōwo
 Eedotadēē quēwēnāni adobai wacā beyænque
 nē cæte quēwēnāni bai īnōnāni inte wæwente
 quēwēnānīpa. 26 Eedotadēē inguipoga ongōñömö
 bai mōnō öönædē æite Eedotadēē bai iñömö
 ongongæimpa. Māñiñömö Eedotadēē nāni āñömö
 mōnō badā Tada wodi bai impa. Tada iñömö wīi
 wacā ingante nē cæcā bai īñōnante mōnō tōmēnā
 wēmō bai īmōmpa. 27 Edæ īmaī ante Wængonguĩ
 beyæ yewæmongatimpa,
 “Bitö owæntabi ēñēmi. Wēñæ mānāmaī īñimi inte
 bitö, Īncayæ ate mancæboimpa, ante wat-
 apæ tocæbiimpa.
 Bitö wēñæ nantadāmaī īñimi inte, Botö īncayæ ate
 toquinque impa, ante yedæ ancæbiimpa.

Edæ nänöogængä ëmö cæte gocä ate adocanque
 inte wëñæ mänämaï iñongante,

Wængonguï, Botö pönömo æncæbiimpa,
 angä ëñengä inte owæmpocä iñömö
 godömenque nanguï wëñænäni inänite
 mãñongä nänöogængä ëacä guiquënë
 wëñænäni wædænque mancæcäimpa,” ante
 yewæmongatimpa.

²⁸ Botö tönĩñamini, ëñëedäni. Wængonguï,
 Bitö wëñængä cöwë pönömo æncæbiimpa, ante
 nänö angainö beyænque Itæca wodi ëñagacäimpa.
 Wængonguï, Cöwë cæcæboimpa, ante mīnitö iminite
 adobaï angä beyænque mīnitö mēmpoga ëñadinque
 tōmengä wēmīni bagamīnimpa. ²⁹ Māññedē iñömö
 Wængonguï Öñowoca beyænque ëñacä iñongante
 Itæca ingante önonque nē ëñagaingä Itimædo
 guiquënë pīinte cægacäimpa. Mänömaï nänö pīinte
 cægai bai inguipogaque quëwënäni Wængonguï
 wënäni inänite ñöwo adobaï cædänipa. ³⁰ İninqe
 Wængonguï æbänö angä ëñente yewæmongadāni.
 İmaï impa. “Näwä nänöogængä wëñængä
 mæmpocä ëadincöo æñongä nänöogængä beyænque
 cæte nē quëwengä wëñængä wæætē ænāmaï
 incæcäimpa. İninqe nē cæte quëwengä nāna
 wencaya inate mönö wido cæcäimpa.” Ante
 yewæmongatimpa. ³¹ İninqe botö tönĩñamini
 ëñëedäni. Mönö iñömö näwä nänöogængä wëñæmö
 bai inömö inte mönö nänöogængä beyænque nē
 cæte quëwengä wëñæmö bai wīi inömö imōmpa,
 ante ämo ëñëedäni.

Abæ tawænte bai mönō quēwēnō ante

¹ Mönō iine Möitee wodi nänō wææ angainō ante ēñente nē cæmō inte ñä cæyænte bai wæyōmonte Codito, Abæ tawænte bai inte quēwencæminimpa, ante pönō ö ænte ñimpo cæcä beyænque mönō abæ tawænte gote bai ee quēwēmō imompa. İnıne mınıtō iñōmō nē abæ tawænte gogaimıni inte tæi ongöniıne edæ wæætē mänıne beyænque ñä cæyænte bai badämaı iedäni.

² İñänäni, botō Pabodobo apænebo ēñenguēnē quēwēmıni. Mınıtō, Mönō eö togæimō inte quēwengæimpa, ante cæmıni inıne ædō cæte Codito ængä beyænque quēwenguēnēmıni. İñæmpa mänōmaı cæmıni inıne Codito mınıtō beyæ ædō cæte pönō cæquingä. ³ Bitō, Botō eö togæimo inte quēwencæboimpa, ante cæbitawo. Edæ botō bitō imıte iımaı ante apænebo ēñēe. Bitō quēwencæte ante cædıne eö togæımi babi inıne Möitee wodi nänō wææ angainō tōmänō ante bitō ēñente cæte quēwenguēnēmi babaımıpa tōö. ⁴ Pancamıniya, Nō cæmō mönō baııne Möitee wodi nänō wææ angainō ante ēñente cæcæimpa, ante ämınıtawo. İñæmpa mänōmaı ante nē ämıni inte mınıtō mönō Codito ingante do pango cæte bai cæmınıpa tōö. Edæ pango cæte nänēnē goyōmınite tōmengä ædō cæte pönō waadete cæquingä. ⁵ Mönıtō guıquēnē, Wængongui ayongä mönō nē nō entawēmō bacæmöimpa, ante nangui pönı æınente wänō cöñömönıte Wængongui Önöwoca pönō apæneca ēñēinıne mönıtō, Mönō nē nō entawēmō badıne watapæ bacæimpa, ante wede pönēmönıpa. ⁶ Edæ Codito İtota nempo

quëwëningue ëö togæïmö ïmö incæ bagæmö ïmö incæ tömämö adobaï önömonque ïnömö ïmompä. Wæætë edæ Codito ingante wede pönëningue në waadete pönëmö ïñömö mäninö mönö pönënö beyænque waa pönï entawëmompä.

⁷ Minitö guiquënë wëenëñedë godongämæ pogodo gote bai nanguï cædinque waa cæmïnitapä. Edæ ñowo guiquënë mïnitö waa pönï pogodo gote bai cæyömïni æcämë wææ äna ëñënimini inte wæætë Wængonguï nö ante nänö apænegainö ante ëñënamäi cæmïnitawo. ⁸ Wængonguï mïnitö ïmïnite në aa pegaingä inte tömengä ïñömö edæ, Ëñënamäi cæedäni, ante dicæ wææ angantawogaa. ⁹ Edæ, “Yedæ æmpocæïmpä, ante cædinque guiyä pönï da wente ate päö cæquïmo tömäo guipæñö päö yedæ æmpopä,” ante pönëningue ïïmäi ante ëñengæïmpä. Adocanque wapiticæ wææ angä ëñëningue nanguï ïnäni wæætë oda cæte wæcædänimpä. ¹⁰ Mönö Awënë nempo mönö quëwencabo ïmompä, ante pönëningue botö, Minitö botö pönënö bai pönëmïni inte wïi wapiticæ ante pönenguïmïni ïmïnipä, ante pönëmpä. Wæætë edæ æcämenque mïnitö ïmïnite wapiticæ ante wææ angää, ante adinque Wængonguï në apænte angä ingante cöwë godö pangä wæcæcäïmpä.

¹¹ Botö tönïñamïni ëñëedäni. Botö Itota awäa wængacäïmpä, ante apænebo ëñëningue, Ëö togæïmïni baedäni, ante në änäni ïñömö botö ïmote cöwë pïïningue pänäni wæbo aedäni. Incæte botö tömënäni näni änö bai, Ëö togæïmïni baedäni, ante ämo bai tömënäni botö ïmote wïi bæi ongöningue pancædönänimpä. Edæ mänömainö ämo bai

tömēnāni wæætē pīnāmaī īnāni inte, Pabodo Itota nānō wængaiwæ ante apæ necā awædō, ante tee tēwate bai oda cædāmaī incædōnānimpā. ¹² Mīnitō īmīnite nē wapiticæ ante wææ ānāni īñōmō nāmā wido togænte bai cædinque nāmā ta ñænte Codito ingante nē pōnēmīni weca pōnāmaī īnāni inte waa īmāimpā, ante awædō.

¹³ Mīnitō botō tōnīñamīni abæ tawænte gote quēwencæmīnimpā, ante mōnō Awēnē mīnitō īmīnite apænte aa pegacāimpā. Incæte mīnitō, Abæ tawænte godīmōni inte inguipogaque mōni cæinēnō ante godōmenque cæcæmīnimpā, ante cædāmaī iedāni. Wæætē edæ wadāni īnānite godō waadete pōnēnīnque tōmēnāni beyæ ante cæedāni. ¹⁴ Edæ Itota, “Nāmā bitō waadete pōnēnō bai pōnēnīnque bitō wacā ingante adobai edæ waadete pōnencæbiimpā,” angacāimpā. Īne adodeque ēñente cæmō īnīnque Wængonguī nānō wææ angainō incæ tōmānō ante do nē cæmō edæ babāimompā. ¹⁵ Edæ babæidi bai nāēmæ pocænte bai cædinque nāēmæ gāwæī cænte bai cæmīni bai mīnitō nāēmæ wido cædinque wantæ biquēnēmīnidō anguēnē, ante apa quēwēmīnīi.

*Mōnō Wængonguī Ōnōwoca nempo
quēwengæimpā, ante*

¹⁶ Ñōwo āmo ēñēedāni. Wængonguī Ōnōwoca ēwocadinque quēwēedāni. Mānōmaī quēwēnīnque mīnitō inguipogaque mīni cæinēwēnō ante wīī ēñēnīnque nāmā beyænque ante cædāmaī inguīmīni īmīnipā. ¹⁷ Edæ inguipogaque mōnō cæinēwēnō ante adīnque Wængonguī Ōnōwoca īñōmō edæ Baa angampā. Ayæ wæætē æcānō inguipogaque mōnō

cæinewënö ante cæte quëwëna tömengä Wængonguï Önöwoca ingante näemæ Baa angampa. Ìninqe mönö inguipogaque cæinewënö ante wæyömö Wængonguï Önöwoca guiquënë, Wadö cæedäni, angampa. Mänömaï beyæ mīnitö mīmönë wæætedö wææte ante bai entawëmīni inte mīnitö nāmā mīni änö ante ædö cæte cæquimīni. ¹⁸ Incæte mīnitö imīnite Wængonguï Önöwoca nöinö töö æmænte mäocä gomīni inte mīnitö Möitee wodi nänö wææ angainö ante do abæ tawænte gomīni imīnipa.

¹⁹ Inguipogaque mönö cæinewënö ante ëñëninque në cædäni iñömö æbänö cædänii, ante edonque abaimpa. Edæ iïmaï impa. Tömënanī nänöogængä ināmaï iñongante dö godö guëa towënānipa. Wentamö pönëwëninque cædānipa. Önonque guïñëñadāmaï inte nāmā baonque pönëwëninque towënānipa. ²⁰ Wængonguïidi inānipa, ante badöninque ædæ wæænte waa adānipa. Idö bai yewæninque önonque tedewënānipa. Piinte quëwënānipa. Tiyænö tiyæ tedewënānipa. Wacä godömenque ængä ate wædinque piinte awënānipa. Ænguï bawënānipa. Nāmā waa tobote, ante anewënānipa. Wæætedö wææte äninque nāwæ godānipa. Wadö ante nāni cabo wadö ante nāni cabo badinque wæætedö wææte cædānipa. ²¹ Wacä gomonga ængä ingante godö piinte adānipa. Ti nāmæ nanguï bedinque dowænte badānipa. Ayæ nanguï pönī godömenque bedinque nanguï pönī cæninque guïñëñadāmaï inte towënānipa. Ayæ godömenque quiëmë bai në cæināni inānipa. Mänömaï cæte quëwënāni iñömö

Wængonguī Awēnē Odeye nempo ædō cæte edæ guiquinānii, ante do botō āninō bai ñōwo wæætē āmo ēñēedāni.

²² Wængonguī Ōnōwoca ingante ēñente nē cæmō guiquēnē mōnō waincawæ incate bai iīmaī cæmompā. Waadete pōnēmompā. Watapæ tomompā. Gānē entawente pōnēmompā. Ee cæte pīināmaī imompā. Waadete cæmompā. Wadāni beyæ ante waa pōnī cæmompā. Wæntædāmaī inte cōwē cæmompā. ²³ Gānē pōnēnīnque ædæmō cæmompā. Nāmā wææ ānīnque nō cæmō imompā. Wængonguī Ōnōwoca ingante ēñēnīnque mānōmaī cæmō adīnque Wængonguī mōnō cædōnō ante wææ ānāmaī ingampā. ²⁴ Mōnō Codito quīmō inōmō inte mōnō baō tōmengā tōnō awænēmæ timpote bai wængaīmō īnīnque īnguipogaque mōnō cæinēwengainō adobaī awæ timpote bai iñonte mōnō abæ tawænte bai godīmo inte baonque ante mōnō cæinēwēnō ante ēñēnāmaī inte cæmompā. ²⁵ Edæ Wængonguī Ōnōwoca ængā beyænque quēwēmō inte mōnō tōmengā Ōnōwoca tōnō guēa godongāmæ cægonte bai quēwengæimpā. ²⁶ Mānōmaī quēwēnīnque mōnō nāmā waa adāmaī ingæimpā. Edæ wacā tōnō guēa wæætēdō wæætē ānāmaī ingæimpā. Wacā gomonga ængā ingante mōnō godō pīinte adāmaī ingæimpā.

6

Mōnō wacā ingā wacā ingā iñacabo cæcæimpā, ante

¹ Botō tōniñamīni ēñēedāni. Wacā ēñēnāmaī cædinque oda cæte wæcantawo. Īnīnque mīnitō

Wængonguī Ōnōwoca ingante mīni ēwocacabo iñōmō, Māningā nē oda cædingā inte Wængonguī taadonque adodō pō gocæcāimpa, ante cædinque tōmengā ingante ædæmō cæedāni. Mānōmaī cædinque nē apæ necā guiquēnē, Botō adobaī ēñēnāmaī cæinente wīi bacæboimpa, ante pōnente wædinque nāmā wææ cæedāni. ² Wacā teēmente mongænte baī entawengā ate wædinque mīnitō mōnō Codito nānō, Īmaī cæedāni, angainō ēñēnte cædinque tōmengā nānō mongæncōo iñacabo mongænte baī cædinque waa cæedāni.

³ Æcānō ōnonganque ĩna inte, Botō ñænæmo ĩnōmo ĩmopa, ante pōnēna, tōmengā iñōmō nāmā babæ apænete baī oda cæte pōnengampa. ⁴ Īnīnque adocanque nāmā nānō cæinō cōwā adinque adocanque nāmā nānō cæinō cōwā adinque tōmāmīni, Tōmēmō æbānō cæboo, ante nāmā apænte anguēnēmīni ĩmīnīpa. Mānōmaī cædinque wacā nānō cæinō adāmaī inte waocā nāmā nānō cæinonque cōwā adinque apænte ānīnque, Tōmēmō nō cæbo ĩmopa, ante adinque tobaingampa. ⁵ Edæ adocanque nāmā nānō cæquēnēnō ante teēmente mongænte baī cædinque adocanque nāmā nānō cæquēnēnō ante teēmente mongænte baī cædinque tōmāmīni eyepæ cæbaīmīnīpa.

⁶ Ayæ Wængonguī nānō apænedō ante wacā apæ necā ēñēnīnque nē ēñengā iñōmō tōmengā māincoo pancacooga waincooga ænīnque nē apæ necā ingante eyepæ pædæ godongā æncæcāimpa.

⁷ Tōmēmō tā bocate pæte incayō waocā wāānā adomō baī tā pete ængampa. Mānōmaī ingæīmpa, ante nē angaingā inte Wængonguī iñæmpa oda

cæcampa diyæ waocä wamö ænguingää. Ìninqe, Waocä æbänö cæcää, ante adinque Wængongui pönö cæcä ate waocä nänö cægai bai adobai ænte wæcæcäimpa. Ämo ëñëninque mïnitö wïi wacä wapiticæ nänö apænedö beyæ oda cæquënëmïnidö anguënë. ⁸ Edæ minte pædïmö bai tä pete ængä bai cædinque ïmæcaque ante nämä pönente në cæcä guiquënë adobai ïmæcaque nänö ñömænguinque æncæcäimpa. Wæætë Wængongui Önöwocaque ante pönëninque në cæcä guiquënë Wængongui Önöwoca pönö cæcä beyænque tömengä nänö cöwë wænämaï quëwenguinque æncæcäimpa. ⁹ Ìninqe mönö wæntæye badämaï inte wadäni beyæ godömenque waa cæcæimpa. Ñïmpo cædämaï ïmö ïninqe edæ Wængongui, Ìñedë æncæmïnïmpa, ante nänö angaiñedë ïnque bayonte mäniñedë mönö edæ tä pete bai eyepæ pöni æmaïmompä. ¹⁰ Mänömaï beyæ mönö eyepæ ïmö ïñedë tömänäni ïnänite mönö waa cæcæimpa. Ayæ wadäni në wede pönënanï ïñönänite mönö, Adomö ïmompä, ante pönëninque tömënäni ïnänite godömenque nanguï cædinque waa cæcæimpa.

Waa quëwencæmïnïmpa, ante

¹¹ Botö önompoca yewæmöninque tömëmo ñænæmömo yewæmömoï aedäni. ¹² Codito mönö beyæ awäa wængacäimpa, ante në pönënanï incæ pancadäniya, Mänïne ante ëñëninque oodeoidi pïinäni wæcæ wæ, ante nämä wææ cæcæte ante cædänipa. Ìninqe tömënäni, Eö togænte cæmöni ïninqe oodeoidi wæætë mönitö ïmönite waa acædänïmpa, ante cædinque mïnitö

iminite, Eö togæimini bacæminimpa, änänipa. ¹³ Nē eö togæināni incæ edæ Wængongui nānō wææ angainō ante dicæ eñente cædāniyaa. Incæte tōmēnāni, Mōnitō änō bai mīnitō do eö togæimini bamini ate wadāni mōnitō imōnite waa acædānimpa, ante cædinque mīnitō iminite, Eö togæimini baedāni, ante cædānipa.

¹⁴ Botō guiquēnē quiēmenque ante, Waa aedāni, ante dicæ āmogaa. Iñæmpa imæcaque ante botō cæinēmāmo ante botō, Codito nānō wængaiwāa tente bai wæinēmāmo impa, ante bai cædinque edæ mānimāmo ante æmæwo wido cætabopa. Ayæ tōmēmo adobai Codito tōnō āanque bai awāa wænte bai ingaimo inte edæ imæcaque botō cæinēnō ante cædāmai inōmo imopa. Īninqe, Mōnō Awēnē Itota Codito awāa wæninque mōnō beyæ waa pōni pōnō cægacāimpa, ante pōnente wædinque botō māniwænque tōmengā nānō wængaiwænque ante waa ate apænedinque edæ wade ante cōwē waa ate tededāmai incæboimpa, āmopa. ¹⁵ Īninqe eö togæimō incæ bagāamō incæ ōnonque pōni edæ impa. Edæ Itota Codito badongā beyænque mōnō miimō quēwēmompā. ¹⁶ Mānōmainō ante pōnente cæmīni iñōminite Wængongui pōnō waadete piyænē cæcā adinque mīnitō gānē pōnente waa cæcæminimpa. Idægoidi iminipa, ante Wængongui nē nānō angaimini incæ mīnitō mānōmai cæte quēwencæminimpa.

¹⁷ Botō Itota beyæ ante cæyōmō wadāni pānāni wædimo inte botō do baonga āmogate ee eñabo iñōmote ñōwo iincayæ ate mīnitō tōmāmīni edæ ee amīni quēwēmoedāni. ¹⁸ Botō tōniñamini waa

quëwencæminimpa, ämopa. Mönö Awënë Itota
Codito pönö waadete apæncä ëñëninque minitö
mimönë adobai waadete entawencæminimpa.
Mäinque ante yewæmömopa, ante Amëë ämopa.

Wængonguī nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690